



SYNOD HOUTUTE'N MISSIONARY-TE A VETHAKNAU



**KARBI ANGLONG MISSION FIELD AH SEMTUTE
LEH A HUN MATNAU**

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008
NOVEMBER 2025

Hinna Vâk

AN ORGAN OF THE TANGPAI PRESBYTERIAN CHURCH



KHRISTIAN NUPAN

- A Chuam In Um Un
- La Kumtuang Mun Di Khawi Ah
- Khamthei I Do Nau Em?

Editor : Rev. Kamkhotinthang Neihzial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Neikhovak, General Secretary, CKNP
: Tv. Lianmuanthang, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	02
3. Khristian Nupan	05
4. A Chuam In Um Un	09
5. La Kumtuang Mun Di Khawi Ah	11
6. Khamthei I Do Nau Em?	15
7. KKP Activities leh Thiamzilna	25
8. Ei Hihal Thak Kit In	27
9. Chate Lamdik Ah Pui Ding In Kipan Ta'itui	35
10. KNP Huang	38
11. Sunna	39

SYNOD PUIPATE

Moderator : Rev. Vanlalchhuanga
Secretaries : Rev. Andrew LR Khiangte (Sr.)
: Rev. Summinlian Vaiphei (Jr.)
Finance Officer : Upa Tinliankham
Statistician : Rev. Thianganlim Vaiphei
Executive Secretary : Rev. Kamkhotinthang Neihzial
Consultant : Rev. C. Lalremruata

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Synod Kikhawmpi 4-veina (2025) taksa leh thagau ah lawting tak ah mat a hi theina ding in pauchap hitiu.
2. Kochuam Numei Pawl leh Khristian Khanglai Pawl- Central, Bial leh Kochuam/Branch ah puitute â ding in Pauchap hitiu.
3. Rostad Memorial High School ah Teaching, Non-Teaching Staff leh Student-te â ding in Pauchap hitiu.
4. Khawvel buaina kâl ah Kochuamte malam sawnzal thei ah i um ziak un kipak thu gen hitiu.
5. Gamsung buaina ah panlatu pawl chuam chuam ah puitute â ding in pauchap hitiu.

MIGENTHEITE LA PANPI SEK EM?

Migenthei sawmdawl chu LALPA thunglâksak ahi'n, ama'n dit kit sik sek di a hi. " (Thupilte 19:17)

HINNA VÂK simtu dawitakte thokit Jesu Khrista min in chibai!

Kidopi 2na hun lai ah khan China gam ah Khristian naupang pakhat hin Cycle chawkna ding in paisa a neisun chu a khawl sek ah. Zan khat chu Insung Kikhawpna ah a Nu'n naupang nekdi neilo zia ah gilkiyal leh tasam, lungsiat um takte â ding ah a pauchapna chu a hung he ta.

Tichun, zia naupang chun naupang genthei thuakte chu a lungsiat ma ma ah, a hepina chu suklat a nuam ah, panpi theina di lampi a hun ngaitua ta. A umnau ah kipat Bakery dawr naipen ah chun a chia ta vang vang mai hi. Nekthei (vaithum chi khat) zuaktu kiang ah chun a paisa khawl dawk ah kipat 14 pesos man (1 pesos chu India paisa ah ₹ 40-60 a hi) di nekthei naupang gilkiyalte kiang ah piak di chaw a gaw ta. Maleh, nekthei neitu chun ziagual chu Young Men Christian Association (YMCA) ten a pe sek u'i ti thu a la gen piak hi.

Naupang chun nekthei chu chaw'n, YMCA Secretary kiang ah chun naupang gilkiyal nekdi neilote piak ding in a pesawn ta'i. Zia thilpiak a dawn uh chu YMCA chun zilchian in, meeting pawimaw tak a ko ngal hi. Naupang pakhat thilpiak nekthei 14 pesos man chu auction a bawl ua, 1254 pesos a mu be ui. Zia paisa sukpun ah um chu naupang gilkiyalte â ding in a lânsawn zel tau hi.

Zia naupang in Cycle chawkna ding ah paisa a thei kham kham ah a lah khawl, naupang lungsiat um takte â ding ah a piak dawk ah kipat, tam tak ah sukpun chanchin chu YMCA chanchinbu ah chun taklat in a hung um ta. Zia chu New York khawpi ah mi hausa tak, Nu pakhat in a lah sim kha laizang ah! Zia nu chun naupang chu a hawl dawk ah, a mamaw sang ah tamzaw Cycle chawkna di paisa a peta a hi. Simtu dawitakte haw, migentheite panpina ding in panlakna la nei kha ta'm?

"Midangte ding ah malzawlna tuntun chu Pathian in a hezing sek a, malzawlna tam tak in a vuk kit sek hi."



Kochuam Huang

South Asia Dalit & Youth Convention 2025

Council of World Mission leh India Peace Centre guanggalna nuai ah Presbyterian Church of India ah kipat South Asia Dalit & Youth Convention 2025 Programme, ni 2-5 October 2025 sung ah “Celebrating Cultural Identities: Hegemonies and Diversities” thupi mangcha CSI Synod Centre, Chennai ah vaiguan kisiam ah chun Tangphai Provisional Synod thasang in Nk. Ngainunne, Bengaluru Kochuam chu a va pangthei hi.

Kochuam Numei Ni matzaw thu

Pastor Bial Kochuam Numei Pawl te malatna in Kochuam Numei Ni chu Ni 24 October 2025 in Bial leh Kochuam malte’n i lemchandan chiat in lawk leh lawting tak mai in a i mangthei u’i. Bial huapah mang khenkhat a umlai in, Kochuam tin ah mang Bial le a ki-um hi. Kochuam Numei Ni CKNP

guanggalna dungzui in Pathian Biakna Kikhawp, Kipawllimna leh Kidemna a um hi.

Pastor Quarters dinmun

Synod Kikhawmpi 3-veina thupukna dungzui ah Bial thak pathum (3) kihawng-Gangpimual Pastor Bial, Sumtukphai Pastor Bial leh Singngat Pastor Bial te Pastor Quarters di chu malakna a chiatha zing hi. Sumtukphai Pastor Quarters di hi sak pat a hita, Gangpimual leh Singngat Pastor Quarters mun dite le sukfel a hita, sak pat a hinai chet puai.

Karbi Anglong Mission Field vena

Mizoram Synod etkawlina nuai ah Karbi Anglong Mission Field ah Contract Basis ah i Missionary umteu Pu Shyamlal Vaiphei leh Tv. Khamlallian te chu Rev. C. Lalremruata, Consultant malatna in Rev. Vanlalchhuang, Moderator leh Upa Tinliankham, Finance Officer te’n ni 22-26 October 2025 sung in a va vetha thei ui.

PRESBYTERY KIKHAWMPI TE AH UPANAMDET THAKTE LEH TELTIN KITTE			
Sl. No.	Min	Pa Min	
Lamka South Presbytery			
1	Upa Pauminthang Vaiphei	(L) Soitinlal	Têltin kit
2	Upa S. Lallian Vaiphei	Janggin Vaiphei	Têltin kit
3	Upa Soizakap Vaiphei	Hentinlian Vaiphei	Têltin kit
4	Upa SK Baite	Thanglhun Baite	Têltin kit
5	Upa Neikhohau	Mangzalel	Têltin kit
6	Upa Jangginmang	Upa Semngam	Têltin kit
7	Upa ST Kamminthang	Upa Henneipau	Têltin kit
Lamka North Presbytery			
1	T. Upa Thian Neihthang Neihisial	(L) Liankhokam Neihisial	Namdet thak
2	N. Lhunlim Baite	Paokhothang Baite	Namdet thak
3	T. Upa Th. Lalpiaklian	Upa Lallam	Namdet thak
4	T. Upa Lalbiaklian	Kapminthang	Namdet thak
Tanggam Presbytery			
1	T. Upa Lallianmang	Lamkhopau	Namdet thak
2	T. Upa Thangjoylian	Thiankai	Namdet thak
3	T. Upa Lalthianzuan	Kamzalal	Namdet thak
4	T. Upa Thangchungnung	Hentingen	Namdet thak
Lamka Central Presbytery			
1	T. Upa Genlianthang	Upa Kaikholal	Namdet thak
2	T. Upa Hautinpau	(L) Lalkam	Namdet thak
3	T. Upa Paulemthang	(L) Soitinkhom	Namdet thak
4	T. Upa B. Laljoy	(L) Upa Lunkholam	Namdet thak
5	T. Upa Satjohnlian	(L) Kaitinpau	Namdet thak
6	T. Upa Ginneilun	Rev. K. Juanlam	Namdet thak
7	T. Upa K.J. Khaithianlam	Rev. K. Lala	Namdet thak
8	T. Upa Kh. Jameson	Upa Hautinlam	Namdet thak
9	Tv. Satboi	Upa Lianpu	Namdet thak
10	T. Upa TK Malsawm Vaiphei	(L) Tunpau	Namdet thak
11	Upa Kamkhozuan	(L) L. Vunggou	Têltin kit
12	Upa Khupliankap	Tongkholam	Têltin kit
13	Upa Th. Thanglian	(L) Upa Manghau	Têltin kit

TANGPHAI PRESBYTERIAN CHURCH
(Presbyterian Church of India)



PROVISIONAL SYNOD
KIKHAWMPI 4-VEINA

A mun : Gangpimual Kochuam Biak In
A hun : Ni 17-23 November 2025

Puipate

Moderator	: Rev. S. Lama Vaiphei
Secretary (Sr.)	: Rev. Andrew LR Khiantge
Secretary (Jr.)	: Rev. Summinlian
Finance Officer	: Upa Tinliankham
Statistician	: Rev. Thianganlim
Executive Secretary	: Rev. Kamkhotinthang Neihsial
Consultant	: Rev. C. Lalremruata

Programmes

4 November 2025 (*Sepkitui*)

10:00 a.m - 04:00 p.m : Finance Committee

17-18 November 2025 (*Seppatui & Sepkitui*)

10:00 a.m - 04:00 p.m : Synod Executive Committee
(Budget Session)

19 November 2025 (*Nilaini*)

10:00 a.m - 04:00 p.m : Pastoral Committee

20 November 2025 (*Ningani*)

10:00 a.m - 04:00 p.m : Nomination Committee

20 November 2025 (*Ningani*)

06:00 p.m : Palai lawpna leh Report
Lapawl : 1) Mata Pastor Bial
2) New Lamka Pastor Bial
3) Kangvai Pastor Bial
4) Synod Choir

21 November 2025 (*Sinhaini*)

10:00 a.m - 04:00 p.m : Synod Vaihawmna

06:00 p.m : Pathian Biakna Kikhawp
Thugentu : Fraternal Delegates
Lapawl : 1) S. Munnuam Pastor Bial
2) Munpi Pastor Bial
3) Synod Choir

22 November 2025 (*Kgini*)

10:00 a.m - 04:00 p.m : Synod Vaihawmna

06:00 p.m : Pathian Biakna Kikhawp
Thugentu : Upa Luaikhomang, Thingkeu
Lapawl : 1) Phaipheng Pastor Bial
2) Dongjang Pastor Bial
3) Synod Choir

23 November 2025 (*Pathianni*)

10:30 a.m : Pathian Biakna Kikhawp
Thugentu : Rev. K. Jama Vaiphei
Thupi : "Kitilhat tua hitiu" (*Heb 10:24*)
Lapawl : 1) S. Kawtlian Pastor Bial
2) D. Khawzim Pastor Bial
3) Synod Choir

01:30 p.m : Lalpa Zan An Sacrament
Guanggaltu : Moderator
Lapawl : 1) Lamka Pastor Bial
2) D. Phailian Pastor Bial

06:00 p.m : Pathian Biakna Kikhawp

Valedictory Sermon : Rev. Vanlalchhuanga,
Moderator pawtdawk
Lapawl : 1) Panglian Pastor Bial
2) Gangpimual Pastor Bial
3) Synod Choir

KHRISTIAN NUPAN

~ Rev. K. Jama Vaiphei
Chawngtui Kochuam

***Zia ziaak chun, pawsal chun a nu leh pa nusia in a ji chu zawm
ta'n tin, pumkhat hung hita'n au. (Eph 5:31)***

“Khristian Nupan ti hi Khristian pawsal khat leh numei khat damsung ah nupan hi ding ah kicheng tina a hi” atiu. Tangval leh Nungak kicheng a h'em, zi nei khasa leh pawsal nei khasa, langbei ah um gel kichengte le huap in pawsal khat leh numei khat i vak ti khel khel a hi.

1. Bang ziaak ah pawsal leh numei kicheng i ti a h'em i ti leh zia chu Pathian ei lemguatdan leh siamdan a hi. Tulai ah pawsal leh pawsal kicheng a h'em, numei leh numei kicheng i tite hi Pathian ei siamdanlo gual tak ah um a hui ah, zia chu ***“Sexual Perversion”*** a hi. Pathian in ganhingte a siamdan ah chun, a chal leh a nu piandan chuam gel ah a siam a hi. Pawsal a siamdan leh numei a siam ah chun taksa bâk dang zosia kibang maleh a pawsal hinau leh a numei hinau chu a

mat didan leh a nasep di dungzui ah a chuam gel a siam a hi. Gancha leh ganhing neucha cha hawna tiang le, a nu a h'em, a chal a h'em lianzawn a siam a, Ai (*crab*) haw hile a pi hin a note tamtak a puak theina di'n, a nîk a pheng lianzawn a siam ah, tui le tamtak a puak theina di'n a pawn a um a, a no a kêu hun inle a note tamtak a nîksunglam pawn a chun a pawthei a hi. Ziagual zel ah chun Pathian in numei le *Amulspray* helse a awm un a kawi a hi. Zia ziaak chun, numei leh

numei, pawsal leh pawsal kicheng i ti haw hi a siamtu Pathian dodalna a hi.

2. Khristian Nupan chu a damkhawm sung siau â di a hi: Biak In hawng ah kicheng ah Pathian ang ah, Kochuamte hetpi ah kikhutsui hin, Sunday Skul hall a h'em, Pastor Quarters leh Upa In, a lemchangna mun ah kicheng pha thakte hileu le, Khristian te kichenna chu "*Thina'n ei khi masia*" ti a hi. A kua zawk zawk a h'em in a thisana h'em, a ginumlo san nung ah le ginum tak a, a chateu kûl a, enkawl seilian zote Pathian in bangtin a pakcha ta bep diam? ti thei a hui. Tulai sapgam khenkhat ah kicheng patep (*Trial Marriage*) a tiu, a vak kicheng masa phawt ua, kituak ah a kihet uh leh a hun belap di, kituak a kisak beklo ua leh haikit di ti a kicheng a titeu haw khule kichenna za-umna suhpawlche maimai a hui. Pathian ngai in banggual ah kidak um a hi diam?

3. A passed-sa kicheng kuama a um puai: Mothakdan, zinei didan ki-*training* na skul hi khawvel in a um diam vang i hepuai. Counselling Centre haw ah vang kihilna neukhat khat a um hi. Nupan kichengte kizillawkna hi a limited (a tasam) ma ma, mi holimna i het, i insung ah i zildaw uh haw hi a hi tangpi hi. Taksa), Lungthim leh thagau, midang tawh kâl, thil guanggaldan leh a dang dang matchak ngal ding ah pawimaw leh a lo theilo ah i phutkhak di leh matchak di a tam ma ma hi. Sappau in vang i hetna belapna di lekhabu a tam a, ei pau in vang a vâng khawp mai ah, a pawimaw haw gendi hile hin i gam dinmun et in mi'n ei muse mai didan a hi. Kicheng thakte fuina ah a mawngpak i vak gen leh le khenkhat in Pastorten zia haw po khi a gen hi ti pawl le umsek a hi. Mo khenkhat a lutna insung ah kithawl tak ah khawsa thei a umlai in, mi khenkhat chu a chanaute

dang genlo, amau nupan le kisikhawp dek lawi a tam ui. Zia lamkai a hin chu i maban uh a sa khawpmai nalai hi. A diak in, nupan kihotheilona leh inkuanpi dangte tawh kituak theilona i tite hi mawlina leh kiziltilna i taksap zia uh hi deu leh a kilawm hi. *Interpersonal relationship* (midang tawh kâl) leh *conflict management*-mimal kikal ah um didan leh ngaidan kibatlo hun ah suklem sek didan lamkai ah hin kiha zil a pawimaw hi. A zi lungdamlo hun ah, a pawsal in suk lungdam didan, a pawsal lungnat hun ah a zi'n thep lungdam didan helo, het malak a, a khawk zaw chek gendawk/ vatdawk i ti leh inkuan a kituaklona umsekte a leptuak didan i hetlo zia uh, a kikhenzak chu hisamlo, limlo tak ah chengkawm ham ham kitam maithei a hi. Zia lampang ah hin, a thak i ziklo tawp ua leh le midang ziksa bek ledaw i habawl uh ngai leh a kilawm hi. I

insung leh khawtang kichun upna bawm i phut hawm uh a ngai hi. Thildang dang in masawn nasa maleu hin inkuan leh nupan kikal lam a kiziltilna leh hetna kibelapna di matchak lekhabu lam leh kithuhilna lam in chu khanglui lai ngaidan in i cheng nalai ui.

Zia zia chun Thagau in a mawk thamit theilo hetdi, zildi, kisin di leh kizilti di tamtak nupan leh inkuan hinkhua hin i hau ui.

4. Pauchap khawmthei nupan: Khawvel ah i damsung ua kipaknalam ngen tuak thei le a hipua, insung ah nat leh sat, lawsapna, vangsiatna dang dang genlo kipakna leh vangphatna i tuak hun ah le kipakthu genthei, haksatna leh buaina, vangsiatna dinmun zosia ah le i lungdam leh lungkhamna zosia leh i taksap pawimaw zosia bangkim hithei, bangkim he, muntin ah um Pathian kiang ah Pauchapzing thei nupan leh insung hi khêl ah vangpha a um puai ti le hin

a gen uang talua kihi khel pua'na. Bible sim ngailo, pauchap ngailo thagau ah kitui dialo Khristian nupan a um thei hi. Ziagual mite chu chapona, midang chung ah bawlkhial bailamna a suak bai a, mi thagaumite lawtinna leh neinunna chu midang chung ah napha sepna matchak leh Pathian nasepna matchak a hi sek hi.

5. Khristian Nupan hinkhua chun cha leh nau nei leh neilolam in mun lianpen a lua puai a tisek ui. Cha leh nau neiten Lalpa lampi ah theidan dan leh eima phaktawh ah etkawl leh puihuai chu i mawpuak uh a hia, a zia chu Lalpa ah kipat i gochan uh lulpen a hi zia un a neilo kei i um tak inle Lalpa'n ei piaklo a hi i tithei chun eile i lungthim tha-awl intin, Pathian le i chung un kipak ina ti a ginchak um hi. Zia khawvel damsung khêl a sawtzaw kumtuang gam ah kinemte

i hi zia un i damsung chawm chau ah hin Lalpa dawigual in ka hing em? Amalam a mi hausa ka hi em, ka hi paw diam? ti hi thupi'n nei thei chiat leuhin mi vangpha pen hi'tiu.

A khaikhawmna ka gennawp chu Nupan hinkhua hi mithiamte'n "*Learning by errors method*" a h'em "*Error driven learning*" atiu chu a hi. Zia umzia chu i bawlkhialnate ah pat kizil ah thiam deu deu hinkhua a hi. Kuama a full mark-sa zi nei pawsal nei umlo a hi. Zia method hi mithiamte chun i bawlkhialna apat kisukdik, i ngaidan leh hiatdan diklote paithak ah sânzêl, thilpha i hetthakte la lut ah i sunglam, ki-*update* ah i bawlkhialnate bawl khial nawtlo ding ah panlak a hi a tiu. Paul nasan le ki-engbawl ah pan la thak zel a hi leh ei hawle Pathian Thagau kithuapina kisukmasawn zel ah inkuan nuam i siamto zel diu a hi.

A CHUAM IN UM UN

~ Rev. S. Lama Vaiphei
i/c D. Phailian Pastor Bial

“Zia ziaak chun, a lak ua kipat hung pawt unla, a chuam in um un, Lalpa’n a tii. Thilbuak him him khawi kiu in, chutichun, hun lawp ta’ngka” (2 Korinth 6:17)

1. Thumapui: Paul in Korinth khua Kochuam a din ah, mun chuam chuam ah Chanchinpha gen ah a nutsia lai ah hin a chanchin uh a hiatzui leh a lungthim suna tamtak a um ah, zia a ngaikhawkte chu lekthawt in a ziklang a hi. Korinth khua ah hin a ma mimal tak ah a lah lang ziang pawl le a um ua, Greek Temple ah kithawina sanek thu ah kisuthanghuai pawl, temple numeite lak ah kisuthanghuai pawl leh ginna thu ah Paul zilsakna tawh kikal ah khawvel tawh kituak ah kalsuan ding ah zilsaktute a um u’i.

Khristiante chu kiphalamlo ah zia tawbang mite lak ah pat chu kikawichuam ngam ding in a zilsak a hi. A chang leh kikawichuam hi kiphatlam a um hun a um sek hi. Maleh, Khrista nungzuite â ding a chun hangsan tak ah i bawl ngei ngei uh ngai a hi.

2. I kikawichuamna diteu chu

(1) *Kihi’thiangtho di:* Paul hin Isai lekhabu apat a gensawn hi in a kilang hi *‘A lak ua pat hung pawtdaw unla, kihi’thiangtho un”* (Is 52:11). Judate dân ah chun buakna thei a tam ma ma ah, ziagual ah thilbuak him

him a chun kisubuaklo ding in Jawlnei hin a zilsak a hi.

Khristiante mitmu ah hinle, thilbuak hi ah i ngai uh tamtak a um ah, ziagual ah mite mu ding ah kilawmlo ah pat chun kikawichuam ding in Paul hin ei zilsak uh a hi.

(2) *Khawvel ah mi i hi ta puau:* I Lalpau Jesu ngei khan le *“Khawvel ah mi la hi ta pawngal un, khawvel ah mi ka teldaw la hizawu ah, zia khawvel in a huat la hiu”* (Jn 15:19) a la ti a hi.

Khawvel ah mi hitalo, khawvel mite gual ah um ham

ham hi Khristian ten i bawlkhial liantak uh chu a hi. A ma ngei in ka teldaw la hiu ei ti a hi chun, kisaktheina kham a hi.

(3) *Tulai sualna ah kipat kikawichuam di:* Sawlchak Peter in gingthakte kiang ah chun, *“Tu’lai khang ah gitlonate lak ah kipat in kihukdaw un”* (Nas 2:40) tin a la zilsak hi.

I tulai chiat ua gitlona umte hi kibanglo tak tak a hi maithei ah, zia kipat kihukdaw di chu eimau mawpuak chiat ah kawi a hi. Min ei hung hukdaw di hilo in eimau chiat i kihukdawk ding uh a hi.

(4) *Thimlal kulpi chu do ding in:* Paul in Ephesa gam ah melmapa nasep nasa tak chu a mu ziak in *“Thim thilhi ga neilote ah chun panna nei kiu inla, zia sang ah chun a diklona hiatsak zaw tau in”* (Eph 5:11) tiin a la zilsak hi.

Eimau lak ah ngei hinle thimlal nasep a hung kilang sek ah, i hiat unle, i hiatlo unle a chiatha zel sek hi. Kumtuang thina a kipat ei hukdawk, hepina hau ah a khut ban ah ei tuzingpa hatna suang in thim thilhi lak ah panlo bep hilo, a diklo ziau hiatsaktu hi ding in Lalpa’n ei kineppi uh a hi.

(5) *Thupiak i hiu:* A chuam ah um di hi kiphatlam a ngai pua, “Danlo gual ah um suapite zosia ah kipat kikawi kâng ding in i Lalpa Jesu Khrist min in thu ka hun pia la hiu” (2 Th 3:6), bawl ngei ngei ding ah thupiak zawk i hiu.

Mi zosia sukkipak hi i mawpuaknau a hi pua, sepai hi ding ah ei telpa kipakna zawk chu ngaitua ah, danlo gual ah um suapite lak ah kipat le i kikawikang ngam ding uh a hi.

3. Thukhakna

Israel mite thalêk ah Lalpa thuthungbawm zawn kawm ah a zinlai ua khanle, zia tâng ah hin la vakvai sawt talaw tau, hung kipan unla, malam zuan tau in ti in Lalpa Pathian in a la ko a hi. Khrista sepai hangsan, nisin ah Kraws kiput ah zuitute chun, i umnau hi nutsia ngai a hitak inle nusia ngam ding in kineppi i hiu.

Pathian thuthung bawm chu i kawl tho uh a hi mai thei, maleh i umna mun ngai ua hi um sawt talua ta, i kichawn uh hun hi talo a hem? Gallangkhat lam ah kai hitiu, zia tak a chun Lalpa’n thil lopi tak te ei musak nuam a hi. A galkai masa chu malsawmna dawng masa hi mai di i hiu.

LA KUMTUANG MUN DI KHAWI AH

(Lk. 16:19-31)

~ Rev. Thanglianlal
i/c New Lamka Pastor Bial

Mi hausa leh Lazar tekhinthu Jesu'n a gen hi a tak ah um ngei a hi ti ginchat a hi. A hilo tâk inle, a thugen guat miten a hiatchian theina ding ah zia tekhinthu hi a mat a hi.

Zia chanchin ah pat **"La kumtuang mun di khawi ah?"** ti thupi hi mangchan eimau â ding ah zillai pawimawte la dawk in tamlo taklat gua i hi. A chanchin hi i la hiatzing leh ngaithak mun ma-ma a hi zia in genkit ngaitalo in kawi mai hitiu.

1. Gawtmun/Meidil hi a um ngei hi

Gawtmun/Meidil um taksanglo mi tamtak gingtute lak ziang inle a um ui. Jesu'n Mihausapa leh Lazar chanchin tekhinthu mangcha a genna ah kipat hin a um tak tak hi ti muthei a hi. Gawtmun kiti chu- mei mit thei taklona kumtuang ah thawkna mun, mi gilo, thil diklo bawltute kisik ma-ma leh thiammaw kichan ma-mate umna a hia, tuidu ah dangchakna mun, kê leh hagialna, a lung le thi

taklona mun a hi (Lk 16:24-28; Tpn 14:10-11). Gawtmun ah thawkna huaisiatdan chu chawmkhat mai le hilo, kumtuang ah thawkna mun a hi. Suangkul ah migilo tualthatte chu kum 10/20 vel a tangua a pawt kit mai sek ua, kum bituk zat a tin tak leh pawt kit di kinepna a nei thei sek ui. Gawtmun huaisiat dan a hileh pawt kitna lampi umta mawng-mawng puai. Unaute haw, ziagual gawtna huaisia tak mun i chan khak ding chu a lau-um ma-ma ziang hi.

2. Mi hausa meidil lutna ziaƙ

Mi hausapa hi a hausat ziaƙ ah Mithi khua (meidil) ah lut a hi puai. A hausatna a mang thiam pua, a damlai ah hun pha a neite a mang thiam pua, mani masial tak leh midang ngaisaklo in a ma bep a kingai khawƙ a, vaihawmtu Pathian a he phak puai. A kiang ah migenthei Lazar dinmun muzing maleh a limsak pua, midangte haksatna leh gentheina a hetphakpilo hi Pathian dawilam hilo a hi. Hausakna hi Jesu'n a mawƙ dem pua, hausakna mat thiamlo a lau um zia a taklang nuam zaw a hi. Mi hausa zosia gawtmun/meidil ah lut di tina hi diaklo a hi. A langkhat in mi genthei Lazar chu a genthei ziaƙ ah Abraham angsung ah um a hi puai. Lazar in genthei tak kâl ah le ginna leh thawkhatna a nei ziaƙ in kipak leh nawpsak buƙimna mun Vangam ah chun a lût zaw a hi.

3. Khatvei chu thi ngei ding i hi

Mihing chu khatvei tei thi ngei di leh vaihawmna tuak di i hiu ti Bible in ei gen hi (Heb 9:27). Mi zosia Pathian hete leh helote kibang chiat ah Pathian ma-âng ah vaihawm piak ding ah kilâk chiat di i hiu. Pathian awilote leh ama ginglote chu kumtuang meidil ah chia inau. Piangthak Pathian awite chu lopina chang in Paradise/Vangam ah chia inau (Tpn 20:10-15) ti i mu thei hi.

Zing ni thai ni ah thi ziang thei i hi lam i la hemil kha sek a, khawvel nei leh lam khawl khawm in du-amnate'n i la dim a, i hun tamzawte i la mang sek ah, himaleh mihing hinkhua thupilodan leh a chawmdan chu "Sûm hung kilang ah mang kit gual mai" a hi ti'n Jakob 4:14 in a la gen hi. Sam 103:15-16 in le mihing hinkhua/hinna hi hampa tawgual mai a hidan a la gen bawƙ hi. Nikhat ni leh thina tuak ngei di i hiu. I damlai hunte hung

bei intin, zia phat chuleh kumtuang gam hinkhua hung kipan di a hi.

4. Dawitêlna i damlai ngei ah bawl ngai a hi

Zia tekhinthu mi hausapa leh Lazar chanchin ah kipat hin zia lei hinkhua ah i dawitêlnau hin kumtuang dai di siam ngai a hi ti a kichian hi. Vangam i têt diam? Meidil i têt zaw diam? A hunlai ah kingaitua a ngai hi.

Joshua khan Lalpa Pathian a h'em, namdangte Pathian zawk a h'em la têt dinguh tî'n thupukna siam ngal ding in Israelte a dawn a (Jos 24:15), phutluina bangma a bawl pua, amau dawitêlna ngei ah Lalpa chu têt ding in a dawi hi. Zia hin mihingte dawitêlna pawimawdan leh Pathian inle mihingte dawitêlna ei piak a zadân/ngaikhawkdan hiatchian thei a hi. I hinkhua ah Lalpa i têt phawtua leh eimau â ding ah pha ma ma leh Vangam ah ei puilut di a hi. Lal Jesu khan le a thu

ngathatute kiang in “Sum leh Pathian na sem kawp thei puanlau” (Mat 6:24) a tia, laklaw tak dinmun leh Lum lah lum lo, vawt lah vawtlo hinkhua mat a um thei pua, Lalpa nasep i tello leh Sual nasep i tel zaw’u tina a hia, i chan di chu gawtmun a hi mai hi. Pathian in Kumtuang ah hepina mun ah ama tawh umkhawm ding in ei dawi a, Pathian hepina Lal Jesu ah a thawm ah ei piak chu i têt em? a hilo leh i nusia em? dawitêlna zalen ei pia a hi. Lalpa’n nisin hunpha ei pezing ah i zalenna mangthiam ding in ei dawi hi. Mi hausapa leh Lazar dinmun kibatlo gual in i dinmun kibanglo chiat himaleh kibang tak in hunpha ei pia, Pathian in mi hausapa leh Lazar a hepi gel-gel gual in ei hepi chiat a hi.

Thukhakna: Gingtute hin Kumtuang gawtmun/meidil a um ngei hi ti hiatna ah kipat in i Pathian awidan nasa tak in kisui thak hitiu. Tulai khawvel changkang zel ah hin

Bible Thutak gingchatlona leh sawiselna huinung hatdeu deuna kal a hin, Pathian thutak Bible in ei gente hi tukdetzing a pawimaw hi. Kumtuang Gawtmun hi pumpel thei a hia, i gitlo kisik ah Jesu i pawm a, ama ah pianthakna i nei chun pumpel thei ma-ma a hi. A hinlah, Jesu Khrista i pawmlo ah, a zilsaknate i zuilo a hi chun eima dawitêlna ngei in gawtmun lut ngei ngei di i hi. Mi khenkhat in Pathian hi mipha leh hepina ah dim a hi ziak in gilo le hin le gawtmun

ei lutsak phal puan ah ti'n Setan thepzaw in i um hi. A hinlah, Pathian chu mi diktat a hi ziak in a mizia tawh kikal in na a sem thei pua, gitlona chu gawt ngei di leh diktatna chu a phatna'n dit kit ngei di a hi. I thinung tak leh kuaman i dinmun sang danglam thei talo di i hi ziak in tu i damlai ngei a hin i kumtuang mun ding chu Vangam hisak ding in thupukna dik siam ding in Lalpa min in i kichial uh a hi. Amen!

Galilee Dîl & Jordan Lui

Galilee dîl chun a sung ah Jordan lui hung luanglut chu a luandaw sak zel ah, a nuai lam deu ah um Tuipi thi (Dead Sea) chun Jordan lui luanglut chu a luandaw sak talo a hi. Tuipi thi chun hinna nei mawng mawng a um pua, sanga le a hing theilo a hi. Galilee dîl ah chun vang sanga chitin, tui nuai ah hinna nei chi chuam chuam a um ah, a tui a thiang zing a hi.

*Eima ah hung luanglut malzawlnate hi a luandaw sak kit di dan i hiatlo ah i phallo chun Tuipi thi gual mai kha hi di i hui.
Luandaw sak dan i hiat chun Galilee dîl gual kha hi di i hui.*

KHAMTHEI I DO'NAU EM?

~ Rev. C. Kailianson
i/c Singngat Pastor Bial

4. Bang gual ah khamthei i do ding uh a hi ta diam?

Zia dawtna hi dawnhu haksa ma ma di a hi. Lungthim tam tak seng ah, sum leh pai, tha leh zung tam tak seng ah i buapi ding uh a hi zia in awlsam tak ah dawnhu thei mai ding in ka gingchalo a hi. Khamthei do chungchang hi kum tamtak i la do uh a hita, khamthei zuak ah nek leh châk hawlte ziang in le, khamthei do chu a ût hun uh um kha ngei ding in ka gingchai, zia bep chu hilo, i gên tâk gualua, khamthei do chungchang ah hin tha leh zung tamtak a la kiseng ta, sum leh pai tamtak a la kiseng ta, hiziangmaleh, do lawtingzo nailo i hi zia in a do didan ngaitua khawm kit nalai di i hui.

Tu ah i genkhawm diu hi le mun tamtak ah kimang khasa a hi ngei ka gingcha, maleh, zia thu zik hi mangcha khamthei donalam ah i kituai thak ngei uh ka kinêm a hi.

Khamthei i dona ding ah lampi i hiatte ziagual hin ngaitua khawm kit hi tiu.

1) Mimal: Khamthei in a sukkhak masatpen leh khamthei in a suksiat, a khawisiat masakpen chu mimal a hi zia in, mimal

in khamthei do didan, khamthei ah pat kivên didan i hiat chiat a pawimaw hi. Namthu ah min khamthei a bawl sak zia ah addict/ chîng den ta ti hi a um khâk tâk inle tam khel pua'na. Zia zia chun, mimal in khamthei apat kивeng di ka hi ti hih i dinpi tawp a pawimaw hi.

Mimal in khamthei ah pat i kivên bitna ding ah pawimaw masapen

chu, chêp leh muam ah
thiangtho hih a hi. Chêp
leh muam bawl keilo, direct
ah zu addict, no. 4 addict ti
hi um kei puan ah vâng ka
ti puai, a hinla, khamthei
(*a tui, a chang, a powder*)
addict-te zosia hi chu chêp
leh muam ah filim a um
khel puau. Zia zia chun
khamthei i dona ding ah
kalbi masapen chu chêp leh
muam ah thiangthona a hi.

I lawi pawl di têt thiam
a pawimaw a, i lawi leh
pai kualsung (Friend circle)
kitup tak, thil hawi thilpha
ah ei kawkmui ei tawsawt
thei di lawi nei ngei ngei di
a hi.

Chun, Mimal i ti
zinglai ah hin, tanglak
khanglai (kum 13-20) kikal
te hih pilvang diak ding in
i kidawisak hi. Lawi ngai lai
tak, thil thak patep nawp
lai tak, khawel ah pawimaw
kisak lai tak a hi zia in,
zia hun ah hin pilvang a
pawimaw diak hi.

Mimal khantona di
ei tawsawt thei Taksa
Kihelna Sports (*Football,
Badminton, Tennis leh a
dang dang*) kihelte, lekha

sim i Zillai lekhabu khêllam
ah Article, Paper, Journals,
Novels leh a dang dang sim
tam a pawimaw ma ma
hi. Tulai khangthakte hin
hun a nei tam tâk zia kun,
kinawptelna lam ah awlsam
tak ah tai mai a bailam ta a
hi.

2) Insung: Insung mite'n
khamthei i do nau em?
Khamthei tawh kisai him
him nêk hawl na i nei uh em?
Insung mite lak ah khamthei
bawl i um kha em? Insung in
nêk hawl na'n mang zianglo
maleh, Insung mi kua hem
khat bek khamthei tawh
kisai ah nêk hawl i um kha
em? Zia haw hih khamthei
dona ding ah i bawlllo di,
khamthei ah pat i filim na
ding ah i kizawpmatpi keilo
dite chu a hi.

A chung ah i gênte
ah pat hi i filimlo a hi
chun, Insung ah Maicham
siam siam ziang hi tin,
kikhawmzing hi tin, Bible
simzing in pauchapzing
ziang le hinle khamthei in
awl awl cha'n i Insungua
mun hung lua tho tho di a
hi.

Kani chêp-te hih a tam zaw Kani lei bawl na ah kipat hung kipan a hui a, No. 4 bawlte, damdawi chang nete hile a tamzaw a zawk zia k uh a h' em, a mun nai, mu theina di naicha a um zia kua hung kipan a hui. A gen sek uh chu Kani lei bawl Insung mi chu a tâwp leh kani chêp umlo theilo gual ah a ngai sek uh a hi. Zia zia k chun, i Insung in nêk leh châk i hawl na hi pilvang a ngai takzet a hi.

Chun, Insung dinmun hisel tak, a sia a pha kihiltua theina, kigentua theina boruak siam ah nei chiat hi khamthei dona ding in a pawimaw takzet a hi. Nu leh Pa le, cha leh naute'n a lunggimnau a tutna thei dingua kimansa um hi a pawimaw takzet hi. Cha leh naute le nu leh pa'n a gingchat tâk dingua hinkhua mat a kûl ah, Insung mi kitimat, lungel kihethiamtua ah a tâwp khaw k i tun lai ah le kitawsawt tua sau sau thei Insung boruak khamthei dona ding in a pawimaw hi.

Insung ah sum leh pai dinmun a lian a neu hiatsak sik sek a, sum leh pai diktak ah mat ah, i matna kihiat tua hi Insung ah i kiziltîl thak uh khamthei dona ding in a pawimaw hi.

Insung mite hih ei hechian pente, i kinaipi pente a hi zia kun, pan i lâk khawm sau sau ah, i kihiatzui tua chun a la pêt man tate le hûkdawk kit, kai dawk kit a haksalo a hi. Khamthei bawl a um tak leh Insung leh Insungmite hih a thuak nasapên leh a mualphopen i hi sek zia kun Khamthei dona hih Insung ah kipat ah nasa tak ah i do ngei ngei ding uh chu a hi.

Inchên khawsak di ngaituana zia k ah leh zia zia k chu le hi khello Insung ah cha leh nau tawh hun mangkhawm tam mantalo nu leh pa-te Insung in chate khamthei bawl na di lemchang a tam diak in, sum leh pai kiningting in, nei leh lam in kuama êng khello le hinle khawvel nawpchenalam ah cha leh nau thasuak khak a bailam ma ma zia k in, i Insung teu

hih gangual ngaisak zaw diak leh cha leh nau tawh bang gual ah hun pha mat khawm tam di a hem ti hi i ngaituau a kûl in a pawimaw takzet ta a hi. Ziagual a chun, khamthei i donau hile lawting zaw ma ma ding in gingchatna liantak ka nei a hi.

3) KKP leh Khanglaite

Khanglaite hih kum uh ngaitua ah khamthei in a sukkhâk nasatpen a hui a, zia khanglaite lak ah chule tanglak, ngâklak leh tanglak, piting dawk deu nailote lak in a lêng nasa diak hi. Zia hun hih mihing mizia tak leh hîna diktak neina ding ah kisiampitin hun laitak a hi zia in, khamthei a sukkhak phat uh leh masang nei theilo di khawp in khamthei in khanglai hat leh hawi tak takte chu a suhchau den sek ta a hi. Zia chu a hi zia in khanglaite lak ah kipat hin khamthei dona, khamthei lak ah kipat bitna di a hung pawt ah, a hung pian ngai a hi.

Khamthei dona ding ah dawkan hawitak mai chu KKP hih a hi. Gam

changkâng masa leh kum upat naupang zia hile ah mipitingte ngaidân leh nam a la khangto masa khanglai lak ah ngaidan um chu “Khamthei bawl, chep leh muam bawl chu a changkânglo” ti in a gen sekui. Zia chu tawh kisai ah chun, ei uh khanglaite lak ah le i changkâng leh khanto dungzui in, chep leh muam, zu leh khamthei dang ah kihelna ho/manlo/changkânglo sakna lungthim a pian a ngai a hi.

Khanglaite lak ah le Zi leh Pawsal di kihawltuana ah, nei leh lam, sum leh pai ah kihawltualo in, khanchan-nunchan, taksa ki-etkawltûpna te, nek leh châk ah thianthona te i titeu a, kawppi ding i kihawl tuau a pawimaw takzet a hi. Khamthei ah thiangtho leh thiangtho tak ah Khristian sungkuan bulpat chu i chiapidan leh i tuppen a hi zing nalai hi.

KKP hin i kochuam sung ah Khanglaite taksa leh thagau ah a khan zêl theina dingua ma lazing a hi zia in KKP boruak le a

dam theina ding ah chun KKP in khamthei dona nasa tak ah a chiapi a pawimaw hi. Khamthei zia ah KKP member leh mi pawimaw i chên uh a tam ma ma ziang ta a hi.

KochuamtinahKKPte'n khamthei dona department te bang kisiam thei hen lah, a dinmun hawitak cha zilchian ah, budget te kawi ah, KKP member khamthei bawl umte kaibât didan leh a bawllote'n a bawllona dingua malâk didante kingaitua thei leh chu khamthei dona ding ah hawi ma ma ding in ka gingcha a hi.

4) Kochuam leh KNP

Kochuam Committee leh Kochuam Numei Pawl in le nasa tak mai ah khamthei dona hi i chiapiu makmaw a hi. Khamthei dona ding ah budget kawi hi a um ngai pua, hawitak cha zilchian ah, sum leh pai, tha leh zung sêng ah, Khamthei dona lam department Kochuam leh KNP in i siam tâklo lehle KKP mangcha siam dawk ah, zia department chu phungvuk chiat ah i do sup suplo uh

chun, Kochuam hung chia zêl ding in malam kinepna vâk tak thîl theilo di i hîu. A zia chu, Kochuam nasêmtu hawi tak hung hi thei dite khamthei bawl zia in hung kitasam di a hi.

Ei Kochuam bep hilo ah, i gamsung ah kochuam zosia pangkhawm ah, kalsuan khawm a ngai tak zet ta a hi. Kochuam tam tak i um khawmua, bawldan chuam, chiapidan chuam nei chiat hi ziangleu hinle i khanglaiteu chiat khamthei in a sukbuai, khamthei saltâng a hi zia kun, i kibatlonateu kawi dawk ah, i pankhawm ua, i do takzet uh a pawimaw takzet a hi.

5) Khawtâng leh Gamsung

Eimi namte hi i pu leh pa khangua pat Pathian in thilthawnpiak hawi tak ei la piak chu khankhua kivaipua, chêng khawm, hing khawm leh ta khawm ding ah ei la siam hi a hi. Zia zia chun, gamdang leh namdang in a neilo Khawtâng leh Khankhua chiakhawm hih a hi. I In sakpa, i In thangpa haksatna leh nawpsak sak khawmpi sekte i hi

ziakun, kawng bangkim in i
kisam kai vek a, ziagual ah
khamthei in Insung tinte,
ei sukkhâk zia ah hin i
khawtâng khankhua le nasa
tak in ei suhse tai.

I gamsung ah khamthei
bawl a pun zia in gucha-
lacha a pung a, khankhua
ngai dauna, 'eima'
suhkhalo, suhnalo phawt
kisamkaipi nawplona nasa
tak mai in a lian deu deu
ta a hi. Khamthei bawl zia
ah gucha-lacha te ah kipat
kivenna ding in In huang
sâng tak tak leh sa tak
tak mai in i kiûmua, Pi leh
Pu khang ah kipat Inveng
kivetua-te, me leh bu
kidawp tuate chu kichuan
tua talo in i um gamua,
In sak leh In thang ah thil
tungte kihetua khûkle umlo
in i pawngpaw hin gam tau
a hi. Zia hin ngawng phalo
tak mai nei in, khamthei
zuakte'n langsâl tak in a
zuak ngamua, a chaw leh
bawlte'n le langsâl tak in a
bawl tau a hi.

Khawtâng ah Khamthei
i dona dingun, langsâl tak
ah khamthei bawlte i vau
leh zêp gualun, khamthei

zaw k zia ah hausa leh nei
ta-te haw le kivau in kizêp
ngam leh umzia nei ding
in gingchat a um zawi.
Khamthei leh nêkgûk-
châkgûkna hih kizawp mat
a hi zia in, khamthei i do
zawna dingun nêkgûk-
châkgûkna le i do zawu a
pawimaw takzet hi.

A nei nei, a hausa sa
kichung etna'n i dim gamua,
kua hem khat mi hausa khat
in meeting-na "Ahem" a ti
leh a "a dik hi" a ti gualua
khan, sum nei leh mi hausa-
te'n bang bawl leule kam
kêk ngam ki um talo, zia
gualma chun, khamthei
zaw leh chîn (*cultivate*)
zia ah hausa leh nei ta ma
ma mai te'n mi chung et a
lawu a, kuama do malak
sâng in a lung uh i hawlua,
mi hinkhua leh mi Insung
siatna di a bawllam lam
uh le a kihiat talo uh a hi!
Ziagual ah khamthei zuakte
i awimaw zinglai ah hin,
thip bek cha um a, bangma
gênloten le mawna tiang i
nei ui ti hi hiat a pawimaw
hi. A tileh, khamthei lah
a bei ziang tuak pua,
khamthei zung bulpi khawi

tak ah i hawlua, i siamphat ding uh a hi ta diam le, a mulo, a thuaklo kuama lah i um pawngal un?

Ziagual hin vak thîl khawm kit leu hin, ngaidan a piang thei diam.

1) Mimal nawpsakna di bep kingaitua namte; eima Insung damna di bep kibuaipite; mani phung leh châng ah buai den ta namte i hi ziau hi tu ah i dinmun uh hin ei suhchian tai. Khamthei gâl ngei hi le ziagual zel ah i do uh a hî chun zo naisailo di i hiu, a ziak chu, khamthei in a phung leh châng, a inkuan leh a nam bing in ei khen kei pua, i do zawna dingun le i kikhen uh a hi theilosa a hi.

2) I gamsung ah Government nasemtute leh dân leh mual enkawltute'n ginum tak ah nâ sep bep uh hilo in mipi'n le nasa tak mai ah i zathuap uh a kûl takzet ta a hi. A diklo a bawl hun un le mipi pangkhawm in a diklonau kâwk ngam le hin ût a um takzet ta a hi. Ziagual ma chun mipi diklote le nasemtute'n do ngam le hin ût a um takzet hi.

3) Gam lungsiat um, nam lungsiat um i hiu a, ziagual a hih i chia zêl uh chun namdang, gamdang miten ei chûm mang in tin uh, i nei leh go hung lua ding i ti'û, i cha leh naute hin nam dang pau hung thaw in tin uh, nam dangte khankhua hung chiapi ding a hiu, a kipan chu a hi tai! Ei ne sia, ei ne gam, mi banglo ah ei siam 'khamthei' ziangle do zolo, do khawm theilo, kithangthîptua "Gingtute" chun manthailo ngâl maban i nei puau!

Zia ziak chun, Tangphai kochuam sung ah um kochuam mi leh sa-te hin le i gam leh nam in khamthei dona ding ah a malâkna hih malâkpi ah, khamthei dona di matchâk ah i pan theina zosia i pan di uh a hi. Zia chu Pathian thu le a hi ngal a!

5. Bang ziak ah khamthei in ei hi ti zaw a hi diam?

Khamthei in ziagual lawm lawm ah ei zaw mai hih, i ngaitua tak leh lungthim nat a um in, khang chia zêl di hawitak cha i ngaitua vang chun a thim huai huai ziang sek hi. Aizawl, Delhi, Guwahati, Shillong

leh mun chuam chuam ah khamthei zia ah kiman a um ngei ngei leh eimi ni leh thum bêk a kipang tei tei a, nam dangte'n i min dingua ei phuak piak uh "*Narco terrorist*" hih sukdik in a umzing hi, lungthim nat um tak a hi! Mi zât le kipa zolo, gingtu ah kiminvuate zia gual lawm lawm ah 'khamthei' in ei sukbuai hi, thumapui ah i gen uh 'khamthei- WY, No.4, Ganja, Zu leh a dang dang' bep ah buai hilo in, a lau um zaw khamthei dang a le buai i hui; ziate chu chawmcha chan thil khawm kit hitiu.

1) Du-âmna khamthei: Pathian tawh ei suhgamla sek eimite suhbuai nasa ma ma ziang chu dû-amna a hi. Du-âm mai leu hinle pha nalai, khamthei ah i mat uh hih a hi. Du-âmna khamthei zia ah hin, a dik leh diklo le khen chuam thei talo in ei kaw gam a, Pathian nasemtu Pastor leh Upa te ziang le zia khamthei hin ei tâkbuak in, i Insungteu nisin in suksiat in a um zing hi. Insak-Inthang i kidawr tuanau ah te, Government scheme i buaipinau ah te, tawmngaina thil i bawl

dânteu ah hin pu leh pa khang ah pat khankhua nusia in du-âmna khamthei zia in, mani lâwkna ding ah chun a dik zui ngam um talo gual khawp in i um tau a hi. Mani lâwkna ding ah chun midang siatna ding, midang thina di le bawl ngam tawp in i um gam tau a hi. Du-âmna khamthei in a luadimte chun khamthei dang man ding ah i do ngamlo di a kichian mai hi!

2) Êngsiatna/thangsiatna

khamthei: Midang lawtinna leh kipakna kipakpi theilo namte, midang gimna leh thawkna thawkpi theilo di khawp ah êngsiatna leh thangsiatna khamthei in a chawbuai nam i hi ziau hi i khawtâng leh i nam dinmun un a suhchian a, Pathian hing malzawlina ah kipat gamla deu deu mai i hui. I gamsung in sum leh pai le tam deu deu ina, nei leh lam le pung deu deu ina, a hinla, zia khamthei zia ah hin Pathian hing malzawlina tak tak, lunggil sung ah kipâkna tak tak tawm deu deu ding in a kilang hi.

3) Nêkgûkna

khamthei:

Khamthei lak lak ah i gamsung ah minthang ka sak pen chu nêkgûkna khamthei hi a hi. Nidang ah khan chu nêkgûk le i la ti sekun, tu hin chu “Chiadan pangai’ i ti hial tau a hi. Government tawh kisai phawt phawt a dik ah i bawl uh umlo gual tawp in i gam a chia a, mi khenkhat in a gen chu “Pastor-te ziang inle a thasâng uh sawl lemchang leh sawl in au” ti di khawp in Pathian nasepna ziang le dem in a um hi. Lo mu le mu khalo, a damsung ah hampa nâ khat ziangle tho khalo PM Kisan dawng zing a dim in i um ua, Lamka sung ah Building In hawi tak tak ah chêng BPL Card kisuangla keilo ah nei le i um ua, Nu leh Pa sepna kitûp tak tak nei Scholarship la zing Zillai le i um ua, School kai kha keilo Pawl X, XI, XII Certificate hawi tak tak nei i chiapidan uh a hi tai. Tam tak gen di um ina. Manipur sung ah eimi nêkgûkna ah kipat thiàng kei hi kivang ma ma ina.

Khangthakte’n, eima hâtna leh taimatna ah pat in kitodel a

gaw ta puau a, a thawn a hi nâk leh kipak tak ah la sau sau mai, lungawi tak ah midang chan ma ngei ah lâk di gaw ngen in i um tau a, zia haw zosia hile thil thâwn, government ah pat sum piak ngailo ah lâk lût i chiapinau in a hin dawk a hi. Zia haw hile khamthei lau um tak mai, i zaw ngei ngei uh ngai khat chu a hi.

Khamthei chuam chuam ei suhbuai tamtak gen di um ina, ei ne sia, ei suhbuai, Khamthei No. 4, zu leh sa leh a dang dangte i zaw tak tak theina ding in, khamthei dang zosia hi i zaw masak uh a ngai dia aw ti hi ka ngaidân chu a hi. A zungpi thatlo ah, a chung lêklam ah i do pat uh hi in ka ngai a, a zungpi tak tak ding ah ka kawî chu tu ah i gen khamthei muthei le hi chetlo, khawithei le hi chetlo haw hih hi in ka ngai hi.

Thukhâkna: Lalpa Jesu hung kit taleh, eimi namte hi bang gual in ei mu ta diam? Tangphai kochuam ah a nasemtute hi bang gual in ei mu ta diam? “Ka suak ginum, thudik dinpi ah, ei chawisângtu” ei tina diam? Ginum tak ah a Chanchinpha ne setu ‘Khamthei’ do in ei

muna diam?

Zia ah dawtna kisiante hih mimal tin in i dawnhu di, Lalpa kiang ah i dawnhu di hung hi ngei di a hi. Tu tiang dinmun ah thil kichian ma ma ziang khat chu, In leh lo tam tak, nei leh lam tam tak, dinmun leh hîna tam tak hi khamthei leh nêkgûkna zia ah siam leh din a hia, i gam sung in zia haw zosia man hi i hung piak ding uh chu a hi.

Khamthei kiveina leh nêkgûk khawkna ma ma zia chu, vak ki vei vak ah, haisan ziang ah a nung gû umlo di hileh hawi ma ma di a hia, mu theilo gau a nei a, mi tamtak hinkhua siatna leh Inkuan tamtak suhsia a hi zia in, zia haw zosia gau chu hung kile kit in a kivei kate leh nêkgûk ah kitodelte, Insung leh cha leh nau ziang le a hâwi diak seklo hih a hi.

Kochuamte leh mimal in khamthei i dona ding ah phapen leh khamthei ah pat kivena ding ah hawipen chu khawi khâklo, kiveilo, nek hawlina leh sum leh pai hawlina mat kîkeilo di hi a hi. Zia hin a diklo sum nêkgûk, ginumlo tak ah i nasepna sep leh i

mawpuakna ngaikhawklo haw zosia le huap ah i gen un ngai leu hin ût a um hi.

Tu dinmun ah hin chu Khamthei i do zo tak tak nai puau a, hun chia zel ah i kochuam hotu di, i khanglai lawiupate di, i Insungua hotu di khangthakte'n chiana ngaina gual ah thil diklo haw zosia hih a hung ngai khâk ding uh lau a um ma ma ziang a, panla thak in, a zungpi hawl dawk ah do in, ti tak tak zet in do thak leu hin ût a um takzet hi.

I pauchap ua, Lalpa'n khamthei ei dopi di in i dawn ua, lawting puai tiu! Lal Jesu chu khamthei do ding leh thil diklo siampha ding ah hung kit talo di a hi. Zia haw zosia sêm piting ding ah chun 'Kochuam' hih a lah din a hin, Kochuam mite chu i Lalpa khut leh keng ah pang in a diklo suhdik ah, a phalo siampha ding ah mâ i lâk uh a ngai a hi. Kochuamte ziang le a diklo chungchang ah pau ngam talo gam i hî zia un, Khamthei dona ah hin lawting ziang nailo di i hui, Kochuam in do tak tak ah i do tak bep uh leh lawting bep di i hui, Khamthei i do'nau em?

KKP ACTIVITIES LEH THIAMZILNA

~ Upa S. Genmuanlal
Mata

“Pilna chu a pawimawpen ah, tichun, pilna chu nei in, thildang zosia sang in, hetthiamna chu nei in” (Thupilte 4:7)

Thil zosia- a neu leh a lian, bang nâ sem di hileu hinle Thiamzilna (*Education*) hi matchak pawimawpente lak ah khat a hi. Thupûkna dik i siam theina ding in zia thiamzilna hi a pawimaw hi.

1. Khanglaite- tunung ah puitu

Khanglaite chu nam, Kochuam leh gam a ding ah bân/ khuam pawimaw tak a hui. A thahatnau, a pilna’u leh a talent teu chun tuhun leh hun hung tung di Khawvel chu a siampha thei in, a siam danglam thei hi. Zia zia chun khanglaite’n Pathian thu tawh kituak ah a lunglut zawng uh sepdawna ding in hun lemchang (*opportunity*) a mamaw’u hi. Kochuam leh khawtang/Society ah zia hun lemchang chu siampiak a pawimawu hi. Zia hun lemchang i siam piak phawt

uh chun, lampi diklo ah a pet ding uh dâltu pawimaw tak a hi’n, tunung ah puitu muan um in i siam ui tina a hi.

2. KKP Activities in thil a siam phatdân

A nungchang uh siam pitinna ding in khanglaite’n *activities* a pawimaw ma ma ui. A chawmlam ah gen in- Sports, Music, Drama leh Social Service te hi amau â ding ah a pawl ah nasepna (*team work*), *discipline* leh *leadership* a zilna mun uh a hi. Chun, eima kimuanngamna (*self confidence*), mawpuakna/ responsibility leh midangte panpitu hidan a zil dawk ui.

3. Thiamzilna

Hinkhaw lawting matna ding in Khanglaite’n thiamzilna a pawimaw ui. Hiatna leh chitnalamahahungpitinphawt uh chun thil thîldan haksâ (*critical thinking*) leh buaina sukvendan (*problem solving*) a thiam ui. Zia ban ah chun, midangte za-dan (*respect*) leh nunnemna (*honesty*) a zil dawk ui. Khawvel khantodan dungzui in *technology* leh tunung hun hungtung zel ding ah khantona tawh kituak ah

hetna (*Knowledge*) a nei ui. Thiamzilna’n damsung a ding ah pilna, chitna leh lawtinna ei tut bep hilo in Taksa leh Thagau ah Pathian thu hiatna leh Ama (Pathian) ei naisaktu pawimaw tak a hi.

Thiamzilna zia in i Talent neite’u chu phachuam tak in i mang thei un, panpi ngaite i panpi thei un, midang a hethiamlote i hilsawn thei un, Pathian in eima phutawk ah sep di ei piakte chu Pathian lopina ding in i sem thei ui.

ZILTÎLNA DIKLO LAK IN CHINGTHEI UN

Lal Jesu’n pilvânna di tamtak ei hil lak ah pakhat chu ziltîlna diklo lak ah pat kivên di thu hi a hi. Kochuam a dindaw ah kipat sawtlo cha nung in ziltîlna diklo in Kochuam chu a hun suhbuai pan ngal a, tu tiang ah hinle Setan chun matchak pawimaw tak pakhat in a mangzing hi.

Ziltîlna diklo i hiat theina ding un a langsal diakte vak gen hitiu.

- a) Ziltîlna diklote chun kochuam a ngaisang pua’u.
- b) Mi suk lâu ah, puihuai a gua sek u’i.
- c) Khenkhatte chun kikhawp leh thilpiak a ngaisang puau.
- d) Mi In ah lén a hât ua, a kimutua mun sek ua, thi In leh tuaksiate In chu pâwl hawlina leh a gindan uh thugenna in a mang sek u’i.
- e) Missionary leh Chanchinpha hil sang in a pawl uh a ngaisang zaw’u.
- f) Khrista sang in amau a kikawi pawimaw zaw’u.
- g) Kochuam chiadan pangai pawm utlo te hin a chateu hinkhua di le a ngaitua thiam puau a, a khawk ma ma sek hi.

Ziagual ziltîlna diklo mang, ama leh ama kingaisang, midang Pathian biakna bangma’ ngailote lak in kiveng pha’itui.

EI HIAL THAK KIT IN

(Sam 85:6)

~ Tv. Duhlian Pauthianmang
Revival Speaker

Nangma ah la mite a limtheina ding un, ei hial kit lo di la hem?

Thumapui: I kingakna Bible châng Sam 85 na hi Korah chate pakna La ti in gen a hi. Korah chate hi Temple ah nasemtu paknalam ah semtute a hieu ah, tumgit tum leh pakna Lâ Sam ziktuten a pang u'i.

Zia Lâ hi 520 BC tuam vel ah zik hi ding in mithiamten a sut ua, zia hi Israel-te Babulon sal ah kum 70 sung a tân zaw ua a gamlam ua a kilekit nung ua zik hi'na tihi sutdan a hi. Zia hun ah hin Israelte chu a gamlam ua chun puitung in a um tau ah, hinla, Lalpa chu Israelte chung in a lungdam nailo hi in a kilang hi.

Zia a kilatna chu chang 5 na hin hiti hin i mu, *Kumkhua ka chung ua lungna di la hem? a khang a khang ah ka chung ua lungna di la hem?* ti hin a suchian ah, a gamlam ua puitun kit hiziang maleu le Lalpa a lungdamlo zia in a hinkhua uh chu nidanglai ah Lalpa kithuapina leh pawlna a la chanlai gual uh kha chu chang talo hinger in au. Zia zia ah chun Lalpa hial thak kitna ngai in a thûm uh a hi.

1. Halna umzia

Halna tihi thil chuam chuam ah halna a um thei ah- Politics-lam ah halna, thilsiamlam ah halna, thiamzilnalam ah halna, Sumdawnna kawng ah halna leh sakhaw thil ah halna te a um thei hi. Zia halna kiti hi English ah chun Renewal, Awakening, Restoration, Rebirth ti te a hi.

Halna i ti phat leh taksa lim leh lâm hi i lungthim un a hung um sek ah, zia haw chule hina

chung in a thûkzaw leh a huap lianzaw diak in vak ngaitua leu hin. Halna ti chu lim leh kipakna ah lâm mai in a tawp pua, a hina masa (*original*) gual tungzo talo, chau ta chu sukhing kitna, chaw thaw kitna, siamthak kitna, tundin kitna tite. Zia ban ah chun thak kit ti hin a etsak chu a hileh a umlo umsak gennalam hilo in masang ah a la umsa luita chu sukthak kitlam a kaw k kit hi.

Halna (*Revival*) kiti hi Thagau thiangtho zal ah thagaulam ah khatlawna, kisang danglamna leh sukdam kitna ti inle genthei ina. Zia chu Thagau nasepna zal ah mihing lungsung ah nasem in, Pathian kiang ah puikitnate, ama hepi thak kitna leh ama nasem ding ah sukhah kitnate a hi. Zia halna chu chan theina ding ah chun, miten lunggil tak ah Pathian lam ah dangchakna nei ah, kingai tawm ah gitlo kisikna diktak tawh pauchap ah ama a bêl phat uh leh Pathian ah pat siamthak kitna, halna a tung sek hi.

Sam 85:6 hile, a mite chau leh ngui ta chu Pathian ah a

lim kit theina ding ua Pathian kiang ah titakzet ah dawn ah pauchapna a hi. Halthakna tak tak pawlam ah limna mai hilo, sunggil ah takna leh danglamna, mimal, sungkuan, Kochuam leh khawtâng tiang in a khawi pha halna, simna, thianthona leh Pathian thu dawina a hing daw k thei halna, Pathian a ding ah hin thak ah hing ding in a pui huai ui. Zia ngei chu a hi halthakna chu.

2. Halthakna i mamaw zia k

Thagau ah halthakna chan i mamawna hiatna ding in mimal leh Kochuam tinte i thagaulam dinmun vak ki-enchian leu hin. A bik tak mai in ei uh Kochuam bîk hi vak thîl leuhin, i gam ah halna a tun hun lai in tulai khanglai tamzawte hi umnailo ki-um sau sau ngei ina. Buaina zat chuam chuam i tuak to te zia k in i Kochuam le thagaulam in bang tiang a hem in i basap khawlaw ah, tuhin a hileh chu thilpiaklam in nasa tak in halthakna chang in i khangto ah, hinla i thagaulam uh kivelthakna ding in zia a nuai ah te hi a la enkhawm hitiu.

1) Pathian ah limna tak tak neilo

Bible chu nisîn ah a min ah simzing sâ, kikhawp leh a routine pangai gual ah kikhawm zing, hinla tuina tak tak neilo leh hinpilo ah a min mai ah kikhawm, a min mai ah Bible sim, eima hinkhua ah gasua mu di umlo hinkhua. Thugente le eima hinkhua ah a tak ah mu di umlo, thil zosia chu a min ah bawl sâ, hinla, Pathian hepina zia ah bawl hilo, a dân pangai gual mai, bawl di a hi zia ah bawl mai mai.

Lal Jesu thugen hi a lah en leuhin, *La nasep dante, la sepgim dante, la thawk gunchu dante, migilo haw la ngai theilo dante kha ka hiai. Sawlchak hilopi ah ka hi kitite la lah patep ah, zuau thei a hui ti la he tai. Thawk le la thuak tan, himaleh, la thuak zo zel hi; ka min zia in la semgim ta'n, himaleh, la chau diak puai. Himaleh, demna khat ka hun nei hi, la hepina masa kha la nusia tai* (Tpn 2:2-4). Ziagual hi i dinmun a hi khak leh chu

Lal Jesu chu i chung ah kipak diaklo di a hi ti hia in ki-enchian thak kit hitiu.

2) Khawvel dân gual ah hing

Thagaulam ah i halthakna ding uh point dang chu a hileh soal huatlona, soal palzamna leh khawvel mite um gual gual ah umna hi a hi. Gitlo bawl khaw sak lona, kochuamlam ah le nasa tak ah kimang tho, khawvel thil ah le kikang kawi chuamlo, chawpawl nun mang gingtu tamtak i gam in a tam ta, ki-enchian thak hitiu.

Rom mite kiang ah sawlchak Paul in hiti hin a la gen hi, *“zia khawvel dan gual a hin um kiu inla, Pathian dawigual, a pha leh pawmtak leh a bukim chu la hiat theina ding un la lungthim uh siamthak ah um in, hung danglam zaw ta un* (Rom 12:2) a ti a hi. Pathian thu awite chu khawvel mite khawsak gual ah khawsa mai di hilo in danglamna nei ding ah ko i hui.

Masanglai ah gingtu masa i pu pate chun zia hi a la ngaipawimaw ma mau ah,

Jesu nungzui ding ah a kipiak phat uh leh a hinkhaw luite uh nusia in, hinkhaw thak mang ta ding in thupukna a lau ah, Gingu masa i puteu khanle Khristian hiding ah min a khum ua baptisma a chan lai ua khan a sa-awte'u a sut thau ah, zu ne miten le a zunek uh haisan in Pathian â ding ah hinkhaw thiangtho mang ta ding in kipia in a min uh a la khum sek u'i.

Tulai gingu tamtakte chu i tawidan leh i nasepna tiang in ginglotute tawh kikiakna bangma mu di um talo ah mitam tak in hinkhua a matzing lai un, ei uh banggual i hui em? mite hiat leh sim i hinau ah hin simtâk di eimau ah hin a um na em? Mahatma Gandhi in "Jesu chu ka daw i hinla Khristiante vang ka daw i puai," a la tia, a zia chu Jesu zilsakna tawh Khristiante nunchan hi a kikiat bek zia a hi ti'n a gen ui.

3) Pathian thangaina mang deu deu

Tulai gingu tamtakte chu, khawvel thil zat chuam

chuam in i ki-el nasa ma ma ziang tau ah, Kochuam khangto kitena chu thagaulam sang in khawvel thil ah changkanna te hi a hizaw gam tai. Malzawltu sang in a malzawl na ngaina zaw in, sum leh pai ah hausak nawpna in i lungthim ei lua dim ta, Lalpa a din i hun ziang le pe man talo Pathian nasemtu nangawn i tam tau hi.

Kikhawpna ziang inle peldi kal ngakla sa kei ah kikhawm i bang tau hi. Kikhawpna a hung sawt deu khak leh chimchak, kikhawpna le a chawm thei pen ding ah kitet gual in i um gam tau ah, mundang ah i hun tamzaw i matzing lai in Ama biakna hun sawt mat di i lau ma ma sek ui.

Sam ziktu'n, *Sakhichal luicha tuiluang ducha, a hat dup dup gual in, aw Pathian ka hinna hi nangma thangai in a ha dup dup hi. Ka hinna Pathian thangai in, Pathian hing thangai in a dangchak hi. Bangtik leh Pathian kiang tung in, a mel kamu diam maw? ti ah Sam ziktu'n a gen gual hin i nasep i thilbawlte haw hi Lalpa*

thangaina tak tak i nei nau em
ki-enchian thak kit hitiu.

3. Banggual halna a h'em i mamaw'u

Zia khawvel danglamzing
ah hin, halthakna hi *option*
hitalo in kochuamte â ding ah
thil pawimawpen lak ah kawi
a ngaita a hi. Halthakna ah
Kochuam-te phawngthal thei
di thagau ah halna i mamaw
takzet uh a hi. A ziak chu hun
hi a kinaw ma ma ta, Kochuam
in Lalgam na thatho tak leh
hat tak ah i sep theina ding in
zia thagau ah halthakna hi i
mamaw u'i.

Lal Jesun Sardis Kochuam te
kiang ah chun *la thil hidante ka
hiai, a thi hingal ah hing min la
put*, Laodikia kochuamte kiang
in, *sat lah salo, vawt la vawtlo..
bangma ka tasam puai la
tin; himaleh, nang michaga,
lungsiat um leh migenthe,*
*mitthum leh ngawnchang la
hidan la ki hiatlo ziak in*, (Tpn
3:16, 17), Ephesa Kochuamte
chu, *la hepina masa kha la
nusia tai* (Tpn 2: 4).

Zia a chung ah Kochuam
te dinmun kigente hi tulai ah
Kochuamte dinmun uh tawh

vak ki-tekak hitiu in ki-etchian
na'n mang hitiu. Kochuam
nasep na ah le theitawp sua ah
tawmngai tak ah pangzing tho,
hinla, Jesu Khrista hepina tak
tak neilo, a nasepna le hepina
ziak ah sep hitalo, mawpuakna
a hi ziak mai ah sêm gingtu a
kitam tai.

Sualna nisîn in a pung
deu deu ah, gitlona lampi
haw in khanglai it um tak
takte a mangthai zing ua,
ziate hukdawktu ding ah
chun Kochuam ten Sawlkar
leh NGO te khut ah kawi mai
chi a hi pua, i gamsung leh
Kochuam sung siamphatna
ding in halthakna i mamaw ma
ma ui. Thagau thiangtho ah
halthaknalo in khamthei sal ah
tang tamtak te hi Jesu Khrista
ah hinna a neina ding un, siam
theilo ding i hui.

4. Halthakna chan theina ding ah thil pawimaw

I pansakna Bible Sam 85
ah i mu gual in, halna hi daw
ziak ah mawk chan ziang thei a
hi pua, munkhat ah halthakna
program siam ah vak chan
ziang theile a hi pua, Thugen
thiam ziak ah halna hi gendaw
thei ding in ginchak a um pua,

halna kiti chu Pathian ah pat hung kipan di a hizia kichian tak ah i mutheina chu ei hihal kit lo di la hem? ti hin a suhchian hi. Zia ziak chun, zia chu i chan theina ding ah ei lam kisakzaw a ngai ah, pauchapna tawh i dawl a ngai hi.

A ban ah chun, halthakna i chan theina ding ah thil pawimaw ma ma chu eima dinmun kihatchian hi a hi. I kingakna Bible chang ah pat hinle Israelte chun amau dinmun a kihechian ua, halthakna mamaw a hidan uh kihia in, Pathian kiang ah halna dawn ah pauchap uh a hi.

Zia ban ah chun Jesu'n hiti hin a gen ah, *Thagau ah tasam a hila kihete chu mi hampha a hiu, vangam chu a mau a a hi ngal ah*, (Mt. 5:3) ti i muki u'i.

Zia ban ah halna channa ding ah thil pawimaw ma ma Bible ah i mu chu Leng Solomon kiang ah Pathian thugen, *Ka min pu ka mipite a hung kingaitawm ua, a hung pauchap ua, ka mel a hun hawl ua, a nunsiatnau lampi a hun kiheisan phat ua leh, van ah kipat hun ngaitha'ng ka tin, a gitlonateu ngaidam in, a gam*

uh hidam kit di ka hi, (2 Kh 7:14) tihi a hi. Tulai ah gingu tamtak hi chu khawvel thil le thasuak ut diaklo ah Pathian pawlna chan ut hi a kitam ma ma hi. Hinla, i Bible chang taklatna ah i mu chu a hileh a pani chiakawp theilo khat nutsia ngai hi in muthei a hi.

Mimal a hi em, pawl in a hi em, halna chang ding ah chun Lal Jesu min ah sual thupha chawite, mani lawkna di chän ngamte leh mualphona di tiang le a huam di a hi. Tuni hin Kochuamte hin i gam siamphatna di, i gam dam kitna ding in bangzat vei i pauchap kha ta em?

5. Halthakna gasua

Zia thagau ah limna leh halthakna chu a hung tun phat leh Kochuam mite chun a gitlo uh sim in sukthianthona a chang sek ua, thagaulam thil dawi ngailote chun le a hun dawi sek ua, thamuanna neilote thamuanna a pia, gingu chu sukhat thak kit a hisek ua, mi gilo leh buakkaite chun hukdamna a chang sek u'i.

Zia halna dik chun Lal Jesu chawihawi in a um sek ah, ama pak ngailoten ama a pak sek ua,

mi dawilawkte chu sukhangsang in a um ua, ga daw-i-um tak a sua sek ui. Pentecost ni gual ah khan pau thakten a hung pau tau ah, thu manlo genna kam leh thil phalo nekna kamte chu Pathian thu genna leh a lopina puandawna kam a hung suak sek ah, thil phalo bawlna khutte chu Lal nasepna khut phachuam tak a hung hithei sek ta a hi.

Tichun, Chanchinpha ziaak in thi le a huam ta sek ua, zia thagau thiangtho halna chu a dawngtute piak ah a um gual in, nutsia tamtak a neisak sek in, dawn be lam sang in paikhenlam in na a sem diak sek hi. Zia chun, midang Chanchinpha helote vei natna a neisak sek ah, thagau mangthai lainatna a neisak sek ah, Manipur thingtang mi, mi nam mawl ma ma ten Chanchinpha i dawn theina ziaak uh hile kum 1906 kum ah Mizoram halna zalzo i hiu hi.

Thukhakna

Thagau ah halthakna leh i gamsung damna ding ah titakzet ah kâ hun a hita. Kochuamte thagau ah chau leh ngui ah um hun a hitapua,

Kochuam ten thagau mei thak eima hinkhua ei sudanglam tu ding i mamaw mamau ah, Pathian thagau in eihaw theng ah khawvel thim salvaktu ding a mamaw a hi. I chenna khawpi siatna lam zuan ah mangthai zing hih Pathian in thagau ah siamthak leh sukhak thak kit nuam tuntun ding in ginchak a um hi. Zia chu i chan theina ding in Kochuam ten timatak in pauchap thak kit hitiu.

Pathian ah pat halthakna chu mimal in Pathian tawh kicham phawt lehin, zia ban ah chun sungkuan tin in i hidi bang tak ah pan i lak ah, i umna di mun ah i um phat leh Kochuam hung kâng kai intin, Kochuam ten le Pathian na a hidi gualtak ah i hung sep phat leh i gamsung in halthakna chu hung tung ngei ina. Pauchapna in i aw teu sua thak kit hitiu in, i lungthimteu ama dawigual tawh kituak in kisikna tawh a mel hawl thak kit in, malai ah halna i gamsung ah a la tung gual kha a hung tun kit theina ding in titakzet in mitin kun thak kit leu hin, a thu ah ginum Lalpa chun, i gitlonateu ei ngaidam intin ei hihal thak kit ngei in ah.

Tuni hin Kochuam ten zia halthakna khêl ah i ngaipawimaw leh i ngailul zawk ding uh a um puai. Kochuam mite malai Pathian ngaicha ngawi ngawi te chu thagau lam in i keu gamtau ah, thagau thiangtho sukhah thak kitna ngai ngawi ngawi ah pauchap leh thagau mangthaite veinatna nei tak ah pauchapte, midangte veina lungthim pu leh Lalpa â ding ah kivawp thiangtho mi a bei hiai hiai ta, Pauchap thak kit hitiu.

Israelte Pathian ah pat a vakmang in milim pathian-te a biak san ua, hinla Pathian lo in limna, muanna leh kipakna a mu diak puau hi. Tuni hinle zia khawvel thilte ah lungmuanna, kipaknate hawl in i theitawp in

khawvel lam in tai sek maleu hin i tawpna ding chu Lalpa kiang hi tho tho ding a hi ti hi hethak kit hitiu. Israel ten van Pathian kiang ah ei hihal thak kit in a ti gual un, ei unle nidang ah Pathian thagau in i gam a hung kanthak lai ah Revival nasa tak a la tung gual kha a tun kit theina ding in Kochuam ten Ei hihal thak kit in Lalpa ti ah, Pathian kengbul ah titakzet ah i kâzak hun uh chu a hitai. Pathian in a mite a sukhalkit phat leh a thagau thiangtho in a suthak ah, amau ah chun dikna a tungding kit in ama dawigual ah hing ding in a suhat sek in, ama Lalgam na thatho tak ah a sep thei sek gual ua i sep theina ding un Lalpan simtute zosiate ei malzawl ta hen. Amen!

PATHIAN LEMGUATDAN MAK

John Bunyan khan a damlai in, a thugen ngâitha nuamte kiang in thu a gen nuam ma ma ziang sek a, himaleh gèn theilo ding in suangkul in a khumchak kêi uh a hi. Zia suangkul sung ah chun lekhabu lopi tak “Gam Thiangtho Zawtna” kiti chu a hung zik a, zia lekhabu mang ah chun ama khang ah mite bep hilo, tuni tiang ahin le mi tamtakte kiang in thu a genzing ta mai a hi. Pathian thil lemguatdan hi chu a mak sek ngêi hi maw!

Tuni tiang ah hin pau 200 vâl in ledaw a hita, China gam ah zawk ding ah a hawndaw ua khan ni 3 sung in copy 2,00,000 sêt a zuakdawk ngal uh a hi kha!

CHATE LAMDIK AH PUI DING IN KIPAN TAITIU (Thupilte 22:6)

~ *Pi Lhingkhovah*
Sumtukphai

Amasa'n Khrista zal ah ka suapite HINNA VÂK simzingte zosia Jesu min in ka ngainatna chibai ka hun buk hi. Hinna Vâk ah Free Sermon zik ding ah hiatsakna lekha ka mu chun ka kipak takzet ah, a ziak chu, ka lungthim ah ka la puaknatzing Nu leh Pate'n i chateu Pathian in etkawl ding ah ei piak, cha leh naute i etkawlnau ah pan i lakbe theinaw a hi ah mikhat bêk in phatchuampina a nei di kinepna liantak nei pum ah ka hung zik a hi.

Naupangte chu lam dik hil lechin, a hung upat tiang unle petmang ta pua'nau (Tpl 22:6). La thisan ah kipat Pathian in go etkawl ding ah a hun piak chu nang mawpuakna a hi. Nu leh pate'n tuni hin i go lak ua golulpen chate hi bang lampi'n i puihuai uh em? Nu leh Pate i ki-etthak kit uh a ngai hi. A enkawl leh tutiang dinmun tuttu chu Nu leh Pate i hui a, i puinalam lam ah a ga ua pat hung kilangdawk di a hi.

I thuhilnau a dik leh diklo, i puihuaidan uh dik leh diklo

chu a taksau a hung khanlet dungzui ah hung khanglian di a hi. Khawvel chitna leh thiamna, a thagau hinkhua lampiu i puihuai didan Bible ah i mu chu Naupang lamdik hil ah hung khanglian chun Pathian gindan hun he'n tiu in, kikhawp hun gelkhawk intiu in, Pathian chu ka thasang ah Kraws ah ka gitlo ngaidamna ding ah thi a hi ti hechian intiu in, ei hukhingpa a hi ti hechian in a lunggil un vawp thei intin uh, siatna lak ah kipat kiveng thei inau. Ahinla,

tulai i dinmun uh i et chun, Nu leh Pa tamtak te'n chate hi umchanpha kawkm u zolo deu a kihi dia aw! ti thei khawp in chate hi siatna lampi'n a petmang gam ta a hi.

Nu leh pate'n i chate chiat banggual ah i pui uh a hi em ki-enchian thak kit hitiu, i hilnateu hin a teknung tiang ua a hetmil taklo diu leh Pathian dawigual in i pui nau em? ti hi nu leh pate'n a vel in ki-enchian kit hitiu. A hiloleh, kum sawm masang ah i thuzilnau zosia a hetmil uh a hitam? Taksa thiamnalam ah i etkawl hawi chun Officer a hung hithei gual un, thagaulam inle mi minthang, Pastor, Missionary tiang hung hithei ding in i thuhil uh a ngai hi. Dan Lekhabu 6:5-7-na chun chate thunun thei didan kichian tak in ei hil a hi. Lalpa la Pathian chu la lungthim zosia, la ngaituana zosia leh la hatna zosia'n la hepi ding uh a hi. Zia thute, tu'ni ka hun thupiakte hi la lungthim un vawp zing un. In ah la um unle, khual gam ah la umlai unle; la lup unle, la thaw daw unle la chateu het ah la gennawnzing ding uh a hi. Ahinlah, tulai ah

Nu leh Pa tamtak haw hih i et leh i nis'in hinkhua matdan ua chate i puihuaidan uh hi Pathian a lungawina diam ti thei khawp in siatnalam ah hin Nu leh Pate a kipang zo hita leh kilawm in a kilang ta a hi. Nek leh dawn, umchanpha, Pathian ngaisaknalam ah chate kaihuai hi mu di a tam ta pua a khawm ma ma hi. Hinkhua thiangtho manglo ah chate a thiangtho di leh a pha ding ah thuhil a kitam hi. Ei kithiangtho lo ah kawng bangkim ah chate bangti puihuai thei di a h'em? ti Nu leh Pa tamtakte hi kidawng leh gendi neilo kitam ma ma ina. Insung ah Nu le Pa hi chate'n i umchan zosia'u ei ettawn uh a hin, thu phalo gen, midem, nek phalo, khamthei chi chuam chuam bawl, i kicheidan tiang in ei ettawn uh ahin, i hetlo kal un i chateu a lah tung sang man ta sek u'i. Pathian in go lak ah golulpen ah ei piak chingtuap ding ah Nu leh Pa hina tawh ei piak khawm a hi. Nupan kilungtuak ah Pathian suang pum ah chate hung enkawlte'n kawng bangkim in lawtinna a chate'u zal in a mu tei tei u'i.

A chung ah i gen uh khamthei thil Pathian leh mihing inle a dawilo, Nu leh Pa te'n i nek/dawn chun i chateu bang thu zilsak di i hi tau em? Nu leh Pate'n i chate lamdik ah i pui theina ding ah neklo ding ah pha, dawnlo ding ah pha i bawl khak zosia'u haisan a ngai hi.

In hawi tak tak, Gari man tam tak, sil leh chen hawitak tak nei ah chate lamdik ah i puilo chun khawvel hausakna, nei leh go zosia panna bei di a hi. Khawvel i damsung hun chawmcha hin pilna leh thiamna ha del ah delsak ah a thinung uh leh a thagau dinmun ding uh hiatchiansak di hih Nu leh Pate'n i

mawpuaknau lianpen in kawi thei leu hin a dawilo ma ma hi. Ephesa 6:4 ah i mu gual in chate hi'lungna kiu inla, Lalpa thununna leh zilgaina chun kaihuai zaw tau in. Hunpha i neilai hin i chate taksa leh thagau ah thunun di gaw chiat hitiu. Tu dinmun ah gamsung ah i mu tampen uh chu lampi pam ah lusu, leinuai ah zân giakte ding in i chateu puihuai zawlo in Khrista lampi zawtpi di'n kipan tai tiu. Thupilte ah i mu gual un siamphat thei, bawl phat thei a hi pet cha'n i chate siampha di'n Pathian min in i kichial uh a hi.

Simtu zosia â ding in Lalpa'n ei malzawl piak ta hen!

“Bethlehem ah khan

i kiangua um Pathian suklat a hia,

Kalvari ah khan

ei uh â ding ah hung kipia Pathian suklat a hia,

Pentecost ah chun

i sung ua hung umchil Pathian suklat a hi”

~ Robert Baer



PWF 19th BIENNIAL CONFERENCE REPORT

PWF 19th Biennial Conference chu Ni 24-26 October 2025 sung in Rymbai Presbyterian Church (KJP Synod Mihngi, East Jaintian Hill District, Meghalaya ah “Heal our Land” (2 Chronicles 7:14) ti thupi mang in lâwktak ah mat a hi. Zia hun ah hin Tangphai KNP ah pat in PWF Standing Committee Member leh delegates-te kigawm in mi paguk (6) a kipang thei hi. Conference hun ah panmun kichang-Bible Reading and Prayer chu Pi Kh. Thianniang, CKNP Chairman mangcha kitup tak in sukpitin a hi. Chuleh, Pi Neikhovak, CKNP General Secretary ah kipat in Unit Report sukdik ngai umlo in kituptak in a kingaitha’i.

Kum 2025-2027 sung ah PWF Puitu dite:

Chairperson : Mrs Rualkhumi Nampui, Biateram Synod (PCI Guat)

Vice Chairperson : Dr. Ladbasuk Lyngdoh, KJP Sepngi

Secretary : Mrs Lungyile Pame (CHT Synod)

Asst. Secretary : Mrs. Zohmingliani, Mizoram Synod

Treasurer : Mrs. D.T. Kharshiing, KJP Synod Mihngi

Secretary for Women’s Relations: Ms. Badasuk Lyndoh

Administrative Secretary i/c PWF: Rev. ST Kaia Vaiphei

20th PWF Biennial Conference chungchang ah hiat ding ah pawimaw khenkhat:

Zintuntu Synod : Mizoram Synod, A hun: 22-24 October 2027

Thupi : “Renew, Restore, Refresh” (Isaiah 40:31)



**CKNP in Kawlhen Pastor Bial
KNP vena**

A hun : Ni 14 October 2025
Hun mangtu : Pi Veithiannei,
Vice-Chairman



Sunna

UPA LIANTINKAI (1927-2025)



A pianna leh seiletna

Upa Liantinkai (98) hi (L) Pu Pautinlal leh (L) Pi Khawlzachong te nupan chate pawsal lak ah a upapen a hi. Kum 1927 in Bualtang khua Churachandpur District, Thanlon Sub-Division in a la piang hi. 1950 in Pi Ngoudim d/o (L) Pu Haugin tawh Pastor Zaithangpuia khut in a la kicheng ua. Pathian ah pat gochan gil ah ga cha 7 – pawsal 4 leh numei 3 a nei ui. A tute 17 leh tusawn 18 mel a mu malam hi.

Zilna lam

1945 in Halflong, N.C. Hills ah lekha sim in a chia ah, Mission Compound C.H.T. Synod School ah kipat in Class VI a la zo hi. Insung Ûpa a hi na dungzui in Insung a etkawl a ngai tâk ziaik in lekha sim sunzawm thei talo in Inlam ah hung in a zi leh chate tawh Mata khua'n a khawsa tau hi.

Nasepna lam

1972 in Mission Compound, Churachandpur ah NEIG Mission Vacation Bible Training School in Bible Diploma a la zo hi. Concordia Tract Mission kiti (USA) te tawh Missionary nasepna kikhutzawp in Lamka Youth Operation Book Room manager in a la pang ah, Bible Booklet leh tract chuam chuam a la hawmdawk sek hi. Chun, Billy Graham Evangelistic Association (USA) te kiang ah a Magazine uh 'Decision' kiti a lah sek a, ei lak in a hawm dawk sek hi.

Thagau mangthaite lunggil tak ah puaknatna nei in 1974 kum in Mata leh Lingsiphai Meitei Leikai in Missionary nasepna masapen MCO nuai in a la pan tau. 1999 in Kochuam Upa Ordination Central Church, Hill-Town in a chang hi. Kochuam ah kimat nate– Secretary, Finance Secretary, Treasurer in a la pang hi.

Bible Society of India (BSI) Churachandpur Branch in 2007-2021 sung in collector in a la pang hi.

A hun nununglam

A it ma ma a zi Pi Ngoudim in March 1994 a, a gin Pathian angsung in a la chawldam san nung in a chenna khua Mata khua'n Lalgam na a sep zinglai in natna talua nei samlo in a la sepzing Lalpa na chu semzawm zo talo in a thangai ma ma Zion khawpi chu ni 26.03.2025, 08:30 a.m. in Kochuam mipite, a chate leh a tute nusia in kikhen kitna um talo ding in Lalpa mun siam in a la chia masa ta a hi.

Vuiliamna

Ni 26.03.2025 Inmun ah a luang thakdawna Kochuam in Programme mat a hia, Rev. Andrew LR Khiangte i/c Mata Pastor Bial in thakdawna a nei hi. Dak 01:00 p.m. in Mata Vengpi Kochuam Biak In ah Vuina Programme in Rev. Thianganlim Vaiphei, Lamka South Presbytery Moderator in a nei ah, Mata Vengpi Kochuam Lapawl ngaithek a hia, Upa Khamlemlal, Lamka South Presbytery Secretary (Sr.) in pauchapna a nei hi. Thân mun ah Rev. Andrew LR Khiangte i/c Mata Pastor Bial in vuina a nei hi.

*Report petu
Upa Thianminthang
Secretary
Mata Vengpi Kochuam*